

摘藻堂四庫全書薈要

集部

欽定四庫全書薈要

集部

柳河東集卷上
補遺後序



詳校官助教臣常循

欽定四庫全書薈要卷一萬三千七百八十一集部

柳河東外集卷上

唐 柳宗元 撰

賦文誌八首

披沙揀金賦

求寶之道
同乎選才

劉義慶世說陸士衡文如披沙揀金往往見寶
又見鍾嶸文品公外集賦三首皆貞元五年以
後舉進士時作

沙之為物兮視汙若浮金之為寶兮恥居下流況其質

兮五才或闕耀其光兮六府以脩然則抱成器之珍必

將有待當慎擇之日則又何求配珪璋而取貴豈泥滓

而為儔

滓壯士切

披而擇之斯焉見寶盪浸淫而顧盼指炫

煇而探討

炫焚絹切煇戶廣切探音貪

動而愈出幽以即明涅而不

緇既堅且好潛雖伏矣獲則取之翻混混之濁質見熠

熠之殊姿

熠弋入切

久暗未彰固亦將君是望先迷後得孰

謂弃予如遺其隱也則雜昏昏淪浩浩晦英姿兮自保

和光同塵兮合于至道其遇也則散弈弈動融融煥美

質兮其中明道若昧兮契彼玄同儻俯拾而不弃諒致

美于無窮欲蓋而彰將炯爾而見素不索何獲遂昭然

而發蒙觀其振拔汙塗積以錙銖碎清光而競出耀真

質而特殊錐處囊而穢光乍比

趙平原君曰賢者之處世也譬若錐之處囊中

其末立見劍拭土而異彩相符

雷煥得鄴城劍取南昌西山

華華以南昌土不如華陰土報雷煥書兼華陰土一斤致煥煥將拭劍轉精明也

用之則行斯

為美矣求而必得不亦說乎豈獨媚旭日以晶熒

晶音精熒

惠局切帶長川之清淺皎如珠吐疑剖蚌之乍分粲若星

繁似流雲之初卷是以周德思此而岐豐即詠陸文可

侔而昭明是選若然者可以議披沙之所託明揀金之

所裁良工何遠善價爰來拂以增光寧謝滿籛之學

漢韋

賢曰遺子黃金滿

籛不如教子一經

汰之愈朗詎慙擲地之才

晉孫綽字興公作天

台山賦示范榮期期曰此賦擲地必為金聲也

客有希採掇於求寶之際庶斯

文之在哉

迎長日賦

三王迎日
禮用夏郊

題見禮記郊特牲天子適四方先柴郊之祭也
迎長日之至也注云易說曰三王之郊一用夏

正夏正建寅之月也此言迎長日者建卯而晝夜分分而日長也故賦謂寅方卯位以此焉

惟饗帝以事天必推策而迎日寅方肇建俟啓蟄以展

儀

左氏凡祀啓蟄而郊

郊位將初爰用牲而協吉送烈烈之凝氣

導遲遲之陽律猶分可愛之輝

左氏夏日可畏冬日可愛

式佇寅賓

之質

書寅賓出日注云寅敬賓導也

稽之虞典期匪疾而匪徐行以夏

時契惟精而惟一職在馮相

周禮春官馮相氏冬夏致日秋冬致月以辨四時之

序
事傳小正

禮記禮運孔子曰我欲觀夏道是故之杞而不足徵也吾得夏時焉注云得夏四時

之書其書存者有小正

符上春以備儀必脩其始先仲春而有事

故謂之迎時也淑景初延幽陽潛啓當四時之首位用

三代之達禮探蹟索隱得郊祀之元辰極往知來正邦

家之大體事冠前古儀標後王皮弁乍臨土圭之影猶

積

郊特牲祭之日王皮弁以聽祭報示民嚴上也周禮土方氏掌土圭之法以致日景注云日景者夏至景

尺有五寸冬至景丈三尺其間則日有長短

泰壇既罷玉漏之聲漸長

禮記燭柴

於泰壇祭天也張衡漏水轉渾天儀制曰以銅為器再疊差置實以清水下各開孔以玉虬吐漏水入兩壺右

為夜左

變熙熙之純曜流杲杲之晴光璧影始融麗景

才凝於城闕輪形尚疾斜暉未駐於康莊是知迎長日

之儀實王心之所共兆南郊之位乃陽事之所用故可
以知上下之際見天人之交動浮光於俎豆散微照於
苞茅周流金石暉照陶匏異乎天紀不修秦伯尚矜其

秦時

以秦本紀及封禪書考之秦襄公作西時祠白帝
至文公作廊時宣公作密時靈公作吳陽上時祭

黃帝下時祭炎帝獻公作畦時祀白帝皆未嘗立秦時
至漢武元鼎中始立秦時祠太一則秦時乃漢立也賦
云秦矜秦時恐誤

日官失職晉侯徒繼乎夏郊

左氏昭公七年
鄭子產聘於晉晉

侯有疾韓宣子逆客曰寡君疾令三月矣今夢黃熊入
於寢門其何厲鬼也對曰昔堯殛鯀于羽山其神化為
黃熊以入於羽淵實為夏郊三代祀之晉為盟
主其或未之祀也乎韓子祀夏郊晉侯有間

于以迎

之則無為者委照將入豈三舍之足憑

魯陽與韓戰酣日暮援戈揮之

日反三舍

延光可期胡再中之云假

風俗通曰成帝問劉向俗說文帝及徵後期不

得立日為再中向曰文帝少即位不容再中

自然應以繁祉錫之純嘏禮儀

允洽于人神正朔克周于戎夏今我后再新古禮與天地相參應戩穀之宜受之千億奉郊祀之報至于再三然則迎長日恭祀事並虞夏而何慙

記里鼓賦

聖人立制智者研精

題見晉書輿服志記里鼓車駕四形制如司南車又見葛洪所集西京雜記

異哉鼓之設也恢制度于天邑佐大禮于時行即行贊

盛容而立之斯立觀其象可以守威儀之三千

禮記禮儀三百

威儀三千待其人然後行

節其音可以表吉行之五十

賈捐之傳鸞旗在前屬車

在後吉行日五十里

配和鸞以入用並司南而為急

取車制如司南之義若

乃郊薦之儀既陳封禪之禮攸執經千里之分寸可候

度四方而禮容是集施五擊於華山之野知霧氣已籠

用百發乎南山之陽識雷聲所及先聖有作後王式遵

啓玄機以求舊運巧智而攸新相彼良工自殊昧道之

士眷茲木偶應異迷途之人齊步武而無佚差遠近而有倫遵大路罔愆乎禮典聽希聲克正于時巡雖道有環回地分險易固善應而莫實諒知機而有為載考載擊所辨于長亭短亭

庾子山江南賦十里五里長亭短亭謂五里一短亭十里一長亭

匪疾匪徐足分乎有智無智觀其妙矣孰測其微細觀其微矣詎知其啓閉音不衰而得度響其鐘而有制

音鐘

湯詩曰擊鼓其鐘

于以翊龍御于以引天旋異銅渾之儀亦可

敘紫微之星次殊玉漏之制而能涉黃道之日躔周物

之智斯設極深之幾是研鄙繁音之坎坎陋促節之闐
闐妙出人謀思由神假時然後擊贊賞典于今茲動惟
其常契同文于古者由是皇衢以正帝道斯盛恭出
震以成威膺御乾而啓聖我后得以昭文物展聲明不
慙音慙于素可舉而行宜乎騁墨妙呈筆精固敢先三雅
而獻賦庶將開萬國之頌聲

吾子

曰吾子來也以有餘而欲及人乎曰然若用子而能使

竭忠孝乎曰否夫無忠而忠見無孝而孝聞曷若使不見而忠無聞而孝肅然已出熙然已及夫已也渾然矣乎

劉叟傳

魯有劉叟者嘗以御龍術進於魯公

云云

劉叟曰歲不

雨無以出終無以入民枯然視天卿士大夫絕智謀山川禱神祇以祈咸不應臣投是龍於尺池之內不踰晷雷孚上下雷孚東西於是先之以風騰之以雲從之以

雨如君之意欲一邑足之欲一國足之欲天下足之魯
公曰斯龍也其神乎是則寡人之國非敢用也劉叟曰
臣聞避風雨禦寒暑當在未寒暑乎是故事至而後求
曷若未至而先備於是魯公止劉叟而內龍明年果大旱
命劉叟出龍果大雨

河間傳

河間淫婦人也不欲言其姓故以邑稱始婦人居戚里
有賢操自未嫁固已惡羣戚之亂尤羞與為類獨深居

為翦製縷結既嫁不及其舅獨養姑謹甚未嘗言門外事
又禮敬夫賓友之相與為肺腑者其族類醜行者謀曰
若河間何其甚者曰必壞之乃謀以車衆造門邀之邀
嬉且美其辭曰自吾里有河間戚里之人日夜為飭厲
一有小不善惟恐聞焉今欲更其故以相效為禮節願
朝夕望若儀狀以自惕也河間固謝不欲姑怒曰今人
好辭來以一接新婦來為得師何拒之堅也辭曰聞婦
之道以貞順靜專為禮若夫矜車服耀首飾族出謹開

以飲食觀游非婦人宜也姑強之乃從之游過市或曰
市少南入浮圖有國工吳叟始圖東南壁甚怪可使奚
官先壁道乃入觀觀已延及客位具食惟牀之側聞男
子歎者河間驚跣走出召從者馳車歸泣數日愈自閉
不與衆戚通戚里乃更來謝曰河間之遽也猶以前故
得無罪吾屬耶向之歎者為膳奴耳曰數人笑於門如何
耶羣戚聞且退期年乃敢復召邀於姑必致之與偕行
遂入醴隄州西浮圖兩間叩檻出魚鼈食之河間為一

笑衆乃歡俄又引至食所空無帷幕廊廡廓然河間乃
肯入先壁羣惡少於北牖下降簾使女子為秦聲倨坐
觀之有頃壁者出選貌美陰大者主河間乃便抱持河
間河間號且泣婢夾持之或諭以利或罵且笑之河間竊
顧視持已者甚美左右為不善者已更得適意鼻息拂
然意不能無動力稍縱主者幸一遂焉因擁致之房河
間收泣甚適自慶未始得也至日反食具類呼之食曰
吾不食矣且暮駕車相戒歸河間曰吾不歸矣必與是

人俱死羣戚反大悶不得已俱宿焉夫騎來迎莫得見
左右力制明日乃肯歸持淫夫大泣齧臂相與盟而後
就車既歸不忍視其夫閉目曰吾病與之百物卒不食
餌以善藥揮去心怵怵恒若危柱之絃夫來輒大罵終
不一開目愈益惡之夫不勝其憂數日乃曰吾病且死
非藥餌能已為吾召鬼解除之然必以夜其夫自河間
病言如狂人思所以悅其心度無不為時上惡夜祠甚
夫無所避既張具河間命邑臣告其夫召鬼祝詛上下

吏訊驗答殺之將死猶曰吾負夫人吾負夫人河間大喜不為服闋門召所與淫者僕遂為荒淫居一歲所淫者衰益厭乃出之召長安無賴男子晨夜交於門猶不憚又為酒壚西南隅已居樓上微觀之鑿小門以女侍餌焉凡來飲酒大鼻少且壯者美顏色者善為酒戲者皆上與合且合且窺恐失一男子也猶日呻呼懜懜以為不足積十餘年病髓竭而死自是雖戚里為邪行者聞河間之名則掩鼻蹙頰皆不欲道也柳先生曰天下

之士為脩潔者有如河間之始為妻婦者乎天下之言
朋友相慕望有如河間與其夫之切密者乎河間一自
敗於强暴誠服其利歸敵其夫猶盜賊仇讎不忍一視
其面卒計以殺之無須臾之戚則凡以情愛相戀結者
得不有邪利之猾其中耶亦足知恩之難恃矣朋友固
如此况君臣之際尤可畏哉余故私自列云

箏郭師墓誌

郭師時之善箏者故以是稱為誌云丁酉之年
秋既季月闕其園於是始盖元和十二年九月

十六日也。又云：仁人我哀，埋勿弃，以是日葬也。公時在柳州，劉夢得集有與公書云：「發書得箏，郭師墓誌一篇，以為其工獨得於天，姿使木聲絲聲均其所自出，抑折愉懌，學者無能如又云：郭師與不可傳者死矣。絃張柱羌，枵然貌存中，有至音含糊，弗聞噫人亡而器存，布在方冊者，是已余之伊鬱也。宜獨為郭師發耶？想足下因漢書重有慨耳。蓋觀郭師之事，觀公之文，而有感也。」

郭師名無名無字，父爽雲中大將，無名生善音，能鼓十

三絃

阮瑤箏賦曰：箏長六尺，以應律絃，十有二象，十二時柱，高三寸，象三才。唐史音樂志云：箏本秦聲也。

制與瑟同，而絃少。按京房造五音准，此瑟十三絃，此乃箏也。今雅樂清樂箏並十有二絃，他樂皆十有三絃。郭

師所能者蓋
十三絃者也

其為事天姿獨得推七律三十五調切密

邃靡布爪指運掌擊使木聲絲聲均其所自出

擊舊作
繫胥山

沈公謂當作擊音於煥切儀禮曰鉤中指結
于擊掌後節中也又音牽音慳擊也牽也

屈折愉繹

學者無能如自去乳不近葷肉以是慕浮圖道既失父
母即弃去兄弟自髡緇入代清涼山又南來楚中然遇
其故器不能無撫弄吳王宙刺復州或以告乃延入強
之宙號知聲音扑蹈以為神奇會宙貶賀州遂以來性
愛酒不能已因縱髮為黃老術薛道州伯高抵宙以書

必致之至與坐起伯高褻邪人也嗜其音至善處輒自
為擊節教闔管謹視出入餌反栢不食穀三年變服遁
逃九疑叢祠中披取之益善親遇終不屑卒乘暴水入
小舫下岫嶁山求道錄會歐陽師死不果受張誠副嶺
南又強與偕誠死至是抵余時已得骨髓病日猶鼓音
四五行居數日益篤既病自為歌死三日葬州北岡西
志其詞曰雲州生柳州死年五十病骨髓天與之音今
止矣丁酉之年秋既季月闕其團於是始心為浮圖形

道士仁人我哀理勿弃

趙秀才羣墓誌

誌云元和庚寅神永戢又云僕夫
返樞當啓蟄元和五年正月也

嬰曰死信孤乃立

趙氏在春秋時事晉景公三年司寇
屠岸賈殺趙朔趙同趙括趙嬰齊滅

其族趙朔妻成公姊有遺腹走公宮趙朔客曰公孫杵
臼杵曰謂朔友人程嬰曰胡不死嬰曰朔之婦有遺腹

若幸而男吾奉之後果生男屠岸賈索之嬰與杵臼謀
乃取他人子使杵臼負而匿諸將遂索杵臼殺之程嬰
與趙氏真孤俱匿山中至十五年景公疾卜云大業之
後不遂者為崇於是召趙孤及程嬰復與趙田邑如故

王侯世家天水邑羣字容成系是襲祖

古本於祖字下
空三字一本無

空

仕相及嗟然秀才胡伋伋體貌之恭藝始習娶于赤水禮猶執南浮合浦遽遠集元和庚寅神永戢問年二紀益以十僕夫返樞當啓蟄瀟湘之交瘞原隰稚妻號呼幼女泣和者悽欷行路悵追初憫天銘茲什

太府李卿外婦馬淑誌

公集有與李睦州書名字皆不得而詳然公誌及其私必與公相厚者元和五年公時與李俱在永州故云卒於湘水之東誌是時作也漢書齊悼惠王其母高祖微時外婦也顏師古曰謂與旁通者其云外婦本此

氏曰馬字曰淑生廣陵母曰劉客倡也淑之父曰撝既
孕而卒故淑為南康謳者李君為睦州詆狂寇見誣左
官為循州錄過而慕焉納為外婦偕竄南海上及移永
州州之騷人多李之舊日載酒往焉聞其操鳴絃為新
聲撫節而歌莫不感動其音美其容以亡其居之遠而
名之辱方幸其居是也元和五年五月十九日積疾卒
于於湘水之東葬東崗之北垂年二十四銘曰
容之丰兮藝之功隱憂以舒和樂雍佳冶彫殞逝安窮

諧鼓瑟兮湘之游

謂湘靈鼓瑟也

嗣靈音兮永終吉

柳河東外集卷上

欽定四庫全書薈要卷一萬三千七百八十二

集部

柳河東外集卷下

唐 柳宗元 撰

表啓十八首

為文武百官請復尊號

六首

公正集中有為京兆府請復尊號表三又有為
耆老請復尊號表二皆在貞元十九年間蓋為
德宗復聖神文武之號作也其事已詳於正集
之注今又有表六蓋在正集之表前作其上三
表在貞元四年第一表云謂掩全功五年于茲
蓋自興元元年甲子德宗去聖神文武號至貞

元四年戊辰為五年也後三表在貞元五年其
第四表云去年九月三度詣闕上表即上前三
表之明年為五年矣公
時年十七初舉進士云

臣等言臣竊觀前代之盛列辟之英咸保鴻名而崇明
號或配其德或昭其功蓋所以揚耿光彰淳懿而示遠
也其有暗然不耀後嗣何觀蔽而不揚羣臣之罪伏惟
皇帝陛下由正統而臨祚承聖緒而受圖稟高明之姿
於天侔博厚之德于地端教化之本制刑禮之中聲震
八區威加六合運玄造之化靡有不通成陰隲之功莫

之能測是用光膺聖神文武之號其後雖逢阨運今睹
昌期誠我武之掃清猶自咎而抑損同罪已之義明愛
人之仁羣臣等上順聖心以成恭德而退懷大懼謂掩
全功五年于茲若墜冰谷方今百職皆理庶績其凝人
用咸和俗惟丕變陳師鞠旅無犯塞之虞畫界封疆無
專地之患四海寧一萬類蕃滋薄刑溢不寃之聲通賦
蒙勿收之惠西成有穰歲之報南極見壽星之祥靈貺
屢加天恩允荅宣宜固為菲薄以掩盛明尊號之崇願

復如舊況臣等親奉平明之理久蒙覆露之恩恥德美之不彰憂罪戾之將及伏惟陛下復循舊典俯徇羣情誠天地神祇內外臣庶之所望也臣等無任屏營惓懇之至

第二表

臣等言臣等前詣朝堂上表伏請復加尊號奉被還旨未遂懇誠拳拳顙顙不勝大願臣等伏以崇明號昭盛德爰自中古實為上儀以至于我祖宗莫不膺茲典禮

伏惟皇帝陛下有廣運之德弘照微之仁燭幽以明威

遠以武惠澤之被誠浹洽于八方英聲之揚宜越軼于

千古

浹即協切
軼徒結切

而乃久為抑損以守謙恭事有曠而不

遵禮有缺而未備臣等又以為不私與已是謂至公有

美之而莫敢辭有非之而莫敢隱必推於物而順於人

既以徇於羣心又思叶於中典此皆聖人之事也且夫

虛而失實則誇曜而誣質而不華則朴略而固所以王

度資於潤飾帝者務於恢崇將以法日月之昭明配天

地之廣大聳遠方之觀聽兼前代之規模然後表其全功謂之盡善不可以方當陛下臨位羣臣在廷而使鴻名不彰盛典猶闕既無以光昭衆美又無以丕承舊儀則臣等蒙恥於今獲罪於後實為大懼敢忘盡規尊號之崇願從羣議伏惟陛下俯迴宸睠察納愚誠不惟臣等受恩天下幸甚無任區區懇迫之至謹昧死重詣朝堂奉表固請以聞臣等誠懇誠勤頓首頓首謹言

第三表

臣等言前再上表請加尊號實以功德俱茂典禮宜崇

然而不能鋪陳無以動寤愚誠雖竭天鑒未廻臣某等

誠恐誠懼頓首頓首臣等謹按白虎通曰號者功之表

也神農有教田事之勤燧人有興火食之利伏羲正五

始祝融續三皇人為之名以美其事其後帝王之盛洎

我祖宗之明咸因人心而順古道雖損益或異而表功

明德一也臣等是以遵有國之令典採上古之遺文察

人心於謳謠

謳鳥侯切

觀天意於符瑞敢以為請累表陳誠

曩者運丁艱難時或順動陛下思成湯之罪已念周宣

之側身去微號而不稱垂炯戒而自儆

迥切 炯古

應天以德

示人以恭聞于蠻貊戎夷告于天地宗廟是故咸知陛下之志慕義而歸仁潛感陛下之誠通靈而助順令者君臣同德上下叶心百職畢修庶官以序禮法明具教化流行方內歡康天下寧一四人遵業萬類樂生嘉應休徵神物靈貺形于草木著于星辰而辭之以仁壽未臻至化猶鬱遂使德誠可紀名號未崇不告於明神不

示於殊俗將何以知陛下之戡難將何以表陛下之致
平下無以威於四方上無以報於九廟其不可一也淳
古之至化邈而不足烈祖之盛儀廢而不續其不可二
也庶正羣官宗室支屬西土耆長太學諸生黃冠之倫
緇衣之侶萬衆伏闕彌旬織路而乃不從人心以違公
議其不可三也守謙恭卑讓之志忽光大弘遠之圖臣
等誠雖至愚以為大謬伏以常久之德貞夫一也元始
之義善之長也并包覆露天之大也清淨玄默道之妙

也睿智之周物不可以不稱夫聖也妙算之無方不可以不稱夫神也行仁義修典法歌詩頌考文章不可以不稱夫文也却戎狄翦暴逆邊兵以整禁衛以嚴不可以不稱夫武也而合於唐堯乃聖乃神乃武乃文之德臣等謹稽之乾符叶於古典侔德澤之廣配功業之崇昧冒萬死伏請上尊號曰貞元大道聖神文武皇帝臣等竭其精誠發於交感無以迴日其能動天無任屏營惓懇之至謹復詣朝堂奉表固請以聞臣某等誠惶誠

恐頓首頓首

第四表

臣等言去年九月三度詣闕上表請復上尊號惓懇雖竭精誠莫通又懼於累塵聖聽是用中輟大願未畢羣心靡寧臣某等誠勤誠懇頓首頓首臣等生逢昌運早列清朝獲覩文明繼跡聖俊亦嘗考前載於史氏訪遺儀於禮官至於保鴻名尊號之榮昭茂功盛德之美皆烈祖之垂法為累代之成規子孫之所宜丕承臣下之

所宜崇奉陛下纂聖緒而臨下遵令典以制中則亦俯從公卿大夫之請光膺聖神文武之號間者陛下以禍亂之故特貶損以自儆以從一時之宜信為恭也今乃欲遂變更而不復以廢先祖之典則若專焉豈陛下或未之思然臣等實以為懼雖欲行陛下之志奈先祖之典法何伏惟陛下因於憂勞深自咎責命祝史告于天地陳圭幣祠于祖宗布於羣臣聞于兆庶固能降開祐之福致感悅之誠咸和以叶心盡瘁而畢力弼成神造

康濟艱難寇逆掃除暴彊擾順侯衛奉守屏之職夷狄
為來庭之賓兵戎不興邊鄙不聳文軌同於四海貢賦
修於九州至若時候將憊必惟思而內省皇情微軫遂
交感而潛通陰陽和而風雨時年穀熟而財用足休祥
數見福應屢臻此皆天地祖宗垂靈錫祉以成陛下之
志明無不答不享之咎也陛下宜承天意以悅神心增
修盛儀再加明號崇昭報之禮表恢復之功而辭以仁
壽未臻至化猶鬱則若尚懷不足以要天地祖宗雖有

固讓之勤而非重請之義且夫號者其來尚矣燧人神農各旌其事湯以其武而曰武王追我祖宗崇尚古道垂著新法陛下獨為辭讓以守謙冲則皇王將有愧於前祖宗將不悅於後而帝德是非之辨固有所歸國典異同之文後難以守且陛下本為炯誠

炯古迥切一作鑑

以示

敬恭誠謙德也今以先王之道而不敢不法烈祖之訓而不敢不承又謙德之大也若乃守獨善而遺公議執小讓而忽宏規違臣庶之心廢祖宗之典乃所以失陛

下之恭德又徒以掩陛下之全功臣等雖誠至愚竊所
不取輒敢徵之國典酌於經義取夫貞者事之幹元者
善之長以配聖謨神化之盛文德武功之崇叶紀年之
嘉名遵舊號之美稱以如開元故事謹冒萬死請上尊
號曰貞元聖神文武皇帝伏惟陛下沛然迴慮俯徇羣
情然後聖德之光昭玄功之茂著後代得揚盛美而鑑
至清是羣臣之願也不勝懇迫之至謹奉表詣闕固請
以聞臣等誠勤誠懇頓首頓首

第五表

臣頌等言臣等伏以尊號未復累具陳請伏奉詔旨固
守謙恭臣等上授天地神靈次奉祖宗典法列經義而
順古因人心以從時詞繁而不能陳明誠竭而未蒙察
納德美盛而猶蔽憲度缺而莫修罪戾是憂永炭交集
臣某等誠惶誠恐頓首頓首臣某等伏以先王之道由
大中而可久近古之化以彌文而益彰然則守謹而為
恭不如立中而垂法表樸而略禮不如文明而化光況

於文質異時而國家自有制度豈直為一王之法固以
遇三代之文其於規模信為弘遠陛下嗣訓先祖貽謀
後聖當踐修以纂承寧變更而廢墜臣等又伏讀詔書
曰遐想哲王則自燧人神農殷湯之時有其事也又曰
欽若典訓則自代宗肅宗玄宗而上有其儀也又曰所
誠者滿所尚者謙守之以誠期於終始臣等以為去鴻
名而貶損謙之始也遵舊典而奉承謙之終也造次而
未嘗違於禮守之以誠也敬恭而無或陷於專所誠者滿

也又曰虛美崇飾所不敢當伏惟皇帝陛下恤人之心
動天之德致理之文教戡難之武功著於頌聲光於史
氏上有其實無虛美之嫌下盡其誠非崇飾之偽又曰
勉一乃心共康庶政曩者公卿大夫侍御攜僕或從扈
牧圉或備持戈矛盖有同力之誠而無離德之間今者
四岳羣后九土庶邦外自藩維內及宗室黃髮耆老青
衿諸儒或僉以同辭或遠而抗疏一心之効也羣材序
進百職交修烽燧不驚兵戎以息鑽鑿不用獄訟以衰

六氣和而風雨時五穀昌而倉廩實庶政之康也誠由
教化以致雍熙自當冠於皇王寧復謝於堯禹宜加明
號以表成功陛下雖以為辭臣等未知其說又伏奉詔
旨令臣等斷表伏以君親一致臣子一列而春秋之義
不以父命辭王父命臣某等得遵先帝之典以違陛下之
詔謹昧冒萬死伏請復上尊號如前不勝惶懼懇迫之
至

第六表

臣頌等言臣等今月七日所上表昨十五日下詔旨加辭讓愈固臣等感謙冲於盛德而私有舊典隳廢之憂懼煩瀆於聖聽而內懷微誠懇迫之切進退兢惕不知所措臣某等誠惶誠恐頓首頓首臣某等伏以事貴舉其中名惡浮於實得其中不宜變之而失正有其實不必避之以為恭況於祖宗之矩儀國家之典制陛下教尊道備德博化光辭取於貶損而自卑朴略而大簡者也昔漢宣帝謂元帝曰我漢家亦自有制度諸葛孔明

誠其主曰不宜妄自菲薄前史載之詳矣幸陛下思之

臣等又以為執小讓之賢不足以方得宜合度之善去
鴻名之敬不足以補變法改作之專陛下行之將何所

守伏以高祖受其明命歷代承以聖德至陛下又有下
武繼文重熙累盛之美不可謂德之不嗣也躬上聖之

姿合至神之化有

一無有字

戡禍亂制邊鄙之武脩禮樂垂

憲度之文不可謂實之不孚也比年以來俗化斯厚人
少犯法吏無舞文獄犴將空梏拏不用可謂人皆遷善

豈曰俗未勝殘然若辭之所未寤也況於尊號之美陛下已受於初去之即由於艱虞復之宜因於康靖徒示其罰不旌其功何以知區宇之削平何以知宗廟之興復似非陛下之本意但自欲改先祖之遺儀耳內之臣庶跋履山川思報主恩誓雪國恥亦欲摠其宿憤表其成勞陛下猶掩鴻名罔窮其事則此等如有未盡不以爲歡儻陛下以自咎責之心尚或未弭則群臣不能匡一作輔之罪亦當未除將何以蒙陛下之恩私將何以受

陛下之爵賞君猶含垢臣以偷榮上下之情必深反側
又無以示於萬古無以威於四夷皆非遠圖且乖大體
臣等懷此數者悵悵而不能自安謹昧冒萬死重違詔
旨伏請復上尊號以如前表伏惟皇帝陛下思聿修無
忝之言顧屈已從人之義再膺大典俯徇羣心因來月
謁太清宮太廟郊祀上帝遂以告祠實臣等之至誠實
臣等之厚幸不勝惶懼懇迫之至謹復詣朝堂奉表固
請以聞

及大會議戶部尚書班宏又請改所上尊號加奉
道字故其文如後表

與下韓洄請歷數近日徵應祥瑞表次前表皆
在貞元五年作據宏本傳竇叅當國兼度支使
進宏尚書副叅叅當國在貞元五年八年貶又
洄本傳云貞元十年終國子祭酒蓋洄前五
年已為祭酒表
在六年作

伏以睿智之周物而靡不通不可以不稱夫聖也妙算
之無方而莫能測不可以不稱夫神也行仁義修典法
歌詩頌考文章不可以不稱夫文也攘却戎夷戡剪暴

逆邊兵以整禁衛以嚴不可以不稱夫武也而合於唐
堯乃聖乃神乃武乃文之德博施不息而萬物以生推
功不宰而萬化以成合於書之奉若天道之義臣等謹
稽之乾符叶於古典侔德澤之廣配功業之崇昧冒萬
死伏請上尊號曰神聖文武奉道皇帝

及大會議國子祭酒韓洄請歷數近日徵應祥瑞
故又改其文如後表

又伏見陛下以今年四月以來方當雩祭之修而有旱

備之請纔憊期而未害於物深軫念而將卹其人氣潛
通而交感以和澤旋流而滂霈斯遠由是風雨時而霜
電不降稼穡茂而蝗螟不生農功以成年穀大熟休祥
數見福應屢臻仁木連理而垂陰嘉禾同穎而挺秀壽
星舒景炎之盛芝草布葩英之重白麋凝彩而雪暉蒼
鳥取象於天色將徧於郡國相繼於歲時右具如表

為崔中丞賀平李懷光表

李懷光德宗建中初為朔方節度使時馬燧李
抱真討田悅未克詔懷光以朔方兵并力進討

為賊所敗會朱泚反德宗狩奉天被圍急懷光
率所部奔命遂敗賊泚解圍去進加副元帥後
誦言天下亂皆由宰相度支京兆尹等或以告
盧杞杞聞之不得朝頗恚恨去屯咸陽遂陰連
朱泚謀反貞元元年為其部將牛勣斬首以
獻公之表當是時作也然公時年十三其為崔
中丞者不詳其人
矣又闕不全云

臣某言伏奉某月日勅逆賊李懷光與臺中人奚奴遺
醜備聞兇險之行頗有殘暴之名陛下略其細微假以
符節盡委朔方之地猶分禁衛之兵不感殊私乃懷異
望間者饋貢不入王師問罪尋令舉軍赴敵而乃終歲

無功洎駕幸近郊勅還舊鎮將掃猾夏之盜因解奉天之圍豈伊人謀蓋是天意陛下但嘉其排難不省其由列為上公命作元帥及躡寇滑汭頓軍咸陽

闕

為裴令公舉裴冕表

裴冕明皇時為河西節度行軍司馬時明皇狩蜀冕自河西還道遇太子平涼遂從至靈武與杜鴻漸崔漪同辭請太子宜正位號及肅宗即位進冕中書侍郎同中書門下平章事後以舉劉烜為判官坐降施州刺史徙澧州傳云大中郭子儀言於代宗曰冕首佐先帝驅馳靈武有社稷勲程元振忌其賢遂加誣罔海內寃之與此表合然此表當為郭令公作其為裴令公

非也又傳云時元載秉政晁早所甄引載德之又貪其哀瘵且下已遂拜左僕射同中書門下平章事不踰月卒據元載之誅在大歷十二年而柳生於大歷八年是時方五歲而此表又當在載未誅之前時公未生或謂公集先侍御府君神道表云汾陽王居朔方備禮延望恐此表乃其先人之作然亦不可得而考此決非公之文也明矣

臣某言聞忠邪不可以並立善惡不可以同道吳任宰

嚮而伍胥誅夷

吳王夫差元年以大夫伯嚭為太宰嘗以報越為志二年悉精兵以伐越之夫

椒越王勾踐使大夫種因太宰而行成吳王將許之伍子胥諫不聽遂自殺吳王以鵠鵠盛其尸投之於江

楚任靳尚而屈平放逐

屈原名平事楚懷王為三閭大夫同列上官靳尚共毀譖之王

乃踈原原既放逐
遂投汨羅江而死

遠惟前事孰不痛心伏見澧州刺史

裴冕忠肅道高德厚匪躬無怠有蹇諤之風道佐先帝

驅馳靈武贊雲雷之業成社稷之勲程元振忌其直方

遂加誣構投荒謫裔天下稱冤空懷醞正之悲莫雪增

嫌之恥今姦邪屏退聖政大明百度惟貞四門以穆震

海之內元元之人莫不延首德音思聞至化願特令追

冕列在天朝俾之端揆庶寮平章百姓處詢謀之任當

燮理之權必能協和萬邦致君堯舜臣位兼將相職忝

股肱思進賢傑共熙帝載臣無任懇願之至

為武中丞謝賜新茶表

中丞武元衡也貞元二十年遷御史中丞公時
為監察御史乃其屬也正集有為武中丞謝賜
櫻桃表此
當次其後

臣某言中使竇某至奉宣旨賜臣新茶一斤者天矜忽
臨時珍俯及捧戴驚忤以喜以惶中謝臣以無能謬司

邦憲大明首出得親仰於雲霄渥澤遂行忽先霑於草
木靈味成自遐方照臨而甲坼惟新煦嫗而芬芳可襲

調六氣而成美扶萬壽以效珍豈可賤微膺此殊錫銜

恩敢同於嘗酒滌慮方切於飲冰

莊子曰朝受命而夕飲冰我其內熱歟

撫事循涯隕越無地臣不任感戴欣忭之至

為裴中丞賀破東平表

裴中丞行立也公正集中有為裴中丞賀克東平赦表事詳見注此表當次之元和十四年作

臣某言月日得進奏官狀報逆賊李師道以某月日克

就梟戮率土臣子慶抃無涯

中謝

臣聞負恩干紀者鬼

得而誅

莊子不為善乎幽闇之中者鬼得而誅之

犯順窮凶者天奪其魄

左氏

襄公二十九年鄭伯有使公孫黑如楚辭曰楚鄭方惡而使子往是殺余也伯有強使之子皙怒將伐伯有氏大夫和之十二月鄭大夫盟於伯有氏裨諶曰善之代不善天命也其焉辟子產舉不踰等則位班也擇善而舉則世隆也天又不自妖孽曷彰聖功伏惟陛下先天除之奪伯有魄

不違與神合契掩周宣中興之業陋漢光再造之勲靈

旗四臨氛沴皆散凡在臣庶盡覩升平伏以師道席父

祖以作威苞海岳而專祿恃東秦十二之險

李師道即淄青之地

有州十二傳五世

誘臨淄三七之兵竊據一方歲踰五紀朝宗

之地曠若外區

禹貢海岱為青州青州東北據海西南距岱也又云海岱及淮為徐州東至海

北至岱南至淮也以其

封祀之山隔成異域

謂東封泰山也在兗

州累聖垂德曾未悛心餘孽滔天果聞折首遂使云亭

有主知玉牒之將封

封禪書炎帝封泰山禪云云黃帝封泰山禪亭後漢志曰云云亭

亭皆泰山下小山也風俗通云封泰山封廣二丈高九尺下有玉牒書

遼海無虞見石罅

之已至

國語武王克商通道于九夷八蠻使各以其方賄來貢使無忘職業於是肅慎氏貢楛矢石砮

長尺有咫砮矢鏃也以石為之砮音奴

此皆陛下神籌

一作算

獨得廟略無

遺授任推盡力之誠縱捨有感心之化金石可貫龜筮

必從克成不戰之功遂洽無為之理臣謬司戎旅遠守

方隅愧無橫草之功

漢終軍當發使匈奴軍自請曰軍無橫草之功師古曰言行草中使

草偃卧故曰橫草也

坐見覆盂之泰

東方朔客難連四海之外以為帶安如覆盂

拊蹈

歡慶倍萬恒情

賀赦表

表云況乃順時布政乘春導和此謂元和改元赦也又云謬當任用職在藩維此必代桂廣帥

臣作

臣某伏奉某月日恩制大赦天下一人有慶百度維新

戴天履土罔不欣抃

中謝

某聞天地成功施雨露而育

物帝王繼統昇日月以垂曜羣品資始萬方文明伏惟
陛下嗣守鴻業光膺駿命淳化均於四序大德合於二
儀保寧社稷光宅區宇弘孝慈以御下崇恭儉以垂休
恩覃溪洞事冠千古況乃順時布政乘春導和敷作解
之澤宣在宥之典九族既睦四門廣闢而又洗滌幽繫
雷雨之施也歸還流竄羅網之釋也移敍貶黜覆載之
仁也蠲除逋債政理之源也褒寵勲賢激勸之方也廢
金寶之貢有以彰儉德搜遺逸之士有以表至公元勲

宿將賞延子孫庶尹卿士榮周存歿廣直言之路啓進
善之門德超虞夏道掩軒頊必將平一殊俗發揮大猷
億萬斯年永荷天緒臣謬當任用守職藩維不獲奔赴
闕庭親覩盛禮感悅歡抃倍萬恒情

賀皇太子牋

憲宗元和十四年羣臣上尊號曰元和聖文神
武法天應道皇帝公時在柳州故云忝守遐方
獲聞盛禮皇太子乃元和七年所立
遂王宥者公是年十月卒于柳云

宗元惶恐言伏奉六月七日制元和聖文神武法天應

道皇帝光受徽號率土臣子歡抃無涯伏惟皇太子殿下麗正居中輔成昌運消伏沴孽贊揚輝光鴻名允升大慶周洽表文武之經緯著天道之運行瑞景照臨示重輪之發耀

崔豹古今注曰漢明帝為太子樂人作四歌贊德其二曰月重輪

恩波下

濟見少海之增瀾

山海經云無鼻之山南望幼涿郭璞注曰即少海也昔天子比大海太子

為少海宗元忝守遐方獲聞盛禮踴躍之至倍萬恒情謹

附賤賀宗元惶恐死罪死罪

賀裴桂州啓

裴桂州即前中丞公行立也行立為桂管觀察使在元和十三年間時淮西已平公前有為賀淮西平赦表此豈赦後有所封贈故公以啓賀之歟

宗元啓伏承天恩榮加寵贈伏惟增感抃慶罔極某聞揚名以顯孔聖于是作經大孝所尊曾子以之垂訓雨露敷澤日月垂光盛德果驗於達人積善必徵於餘慶天下人子羨慕無階某特承恩眷倍百恒品恨以守官不獲奔走拜賀無任展轉惶灼之至

與衛淮南石琴薦啓

衛淮南次公也以檢校工部尚書為淮南節度使在元和十二年淮蔡平後傳云次公本善琴方未顯時京兆尹李齊運使子與之遊請授之法次公拒絕因終身不復鼓而公此文在柳州作則衛時尚鼓琴也史傳之載過乎實矣

疊石琴薦一

出當州龍壁灘下

右件琴薦躬往採獲稍以珍奇

特表殊形自然古色伏惟閣下稟夔旦之至德蘊牙曠之玄蹤人文合宮徵之深國器專瑚璉之重藝深攬醴

將成玉燭之調

爾雅四時和謂之玉燭攬厥縛切醴音夜醇酒也攬醴一本作權澤

思叶

歌謠足助薰風之化

舜作五弦之琴以歌南風曰南風之薰兮可以解吾民之愠兮願

以碩璞上奉徽音增響亮於五弦應鏗鏘於六律沉淪
雖久提拂未忘儻垂不徹之恩敢効彌堅之用

荅鄭員外賀啓

興以下啓皆在元和
十四年淄青平後作

李師道三代受恩四兇負德聖朝含育務在安人不知
覆載之寬弘更縱豺狼之扞蠹王師一發兇首已來萬
姓稱歡四方無事

荅諸州賀啓

李師道累代負恩不起俊革餘孽怙亂更肆猖狂王師
暫勞已致梟戮率土歡抃慶賀難勝太平之功自此而
畢

學古文必自韓柳始兩家文字剥落柳為尤甚國初
文章承唐末五代弊卑弱不振至天聖間穆脩鄭條
之徒唱之歐陽文忠尹師魯和之格力始回天下乃
知有韓柳韓文屢經名士手頃余又為讎勘頗完悉
唯柳文簡古雅奧不易刊削年大來試為紬繹兩閱

歲然後畢見凡四本大字四十五卷所傳最遠初出
穆脩家云是劉夢得本小字三十三卷元符間京師
開行顛倒章什補易句讀訛正相半曰曾丞相家本
篇數不多於二本而有邢郎中楊常侍二行狀冬日
可愛平權衡二賦共四首有其目而亡其文曰晏元
獻家本次序多與諸家不同無非國語四本中晏本
最為精密柳文出自穆家文是劉連州舊物今以四
十五卷本為正而以諸本所餘作外集參考乎證用

私意補其闕如皇室主宜加黃字馮翊王公宜去王
字擊當作擊翊當作翊鮑勛當作鮑信改規當作段
規疥癰宜為疥癰很倖宜為狠倖吳武陵初貶永州
貞符中宜如唐書去量移字韓昇時猶未死荅元饒
州書中宜於韓宣英上去亡友字以唐書孝友傳校
復讎議以楚辭天問校天對以左傳國語校非國語
以唐宋類書唐人牋表校天論等篇其見於唐書者
悉改從宋景文凡漫乙是正二十處而羸又釐革京

兆請復尊號表增入請聽政第二表賀皇太子踐省
試慶雲圖詩摠六百七十四篇鋟木流行購逸拾遺
猶俟後日政和四年十二月望胥山沈晦記

柳河東外集卷下

欽定四庫全書薈要卷一萬三千七百八十三

集部

柳河東外集補遺

唐 柳宗元 撰

墓誌

故連州員外司馬凌君墓後誌

凌君諱準元和元年與公同貶員外司馬凌得連州至三年卒公正集中嘗為凌君權厝誌即此也至是元和四年立太子寧肆赦乃得返葬而公為後誌以志其時云此誌當附權厝誌後今誌訓蓋用胥山沈公所定劉連州四十五卷本故又從其說以諸本所餘作外集此誌與下

四誌皆沈本未有
者用別錄于此

某年月日立太子赦下嘗有非其罪柩得返葬凌氏孤夷
仲求仲自連桂陽舉其先人之柩龜筮吉利某年月歸
于杭之新城祔于其墓刻前志志其行益以後志志其
時立碣于墳東南隅申志于外噫亦勤矣以其先人之
行宜克大于後以其孤之志宜克承于初艱其躬以延
于無窮承而大宜哉

萬年縣丞柳君墓誌

并序

誌云系自周魯後得柳姓七代祖虬後魏中書令封美陽公蓋柳氏自魯士師展禽食采柳下得姓至後魏有諱僧習者為方輿公有五子曰驚曰慶曰虬曰檜曰驚公裔出於慶而萬年公出於虬此系所自別也史表載虬後周中書侍郎美陽孝公與誌稍戾宣史誤耶萬年公貞元十二年卒是年葬誌是時作

惟貞元十二年龍集景子三月日前萬年縣丞柳君終于長安升平里之私第享年五十長子弘禮承家當位次曰傳禮幼曰好禮奉夫人洎中父之命考時定制動合古道三日而殯三月而葬粵五月十九日甲子克開

長安縣高陽原祔于先塋禮也先時撰辰酌禮稱義備
物外姻畢至宗人來會從弟宗元受族屬之教泣涕濡
翰書辭紀行曰君諱元方字某解人也系自周魯後得
柳姓七代祖虬後魏中書令封美陽公四葉至皇考惇
皇朝散太夫資陽令祖延州司馬考頤宣州寧國丞濟
德克紹厥類藏聰晦明粹為淑和少孤季父建撫字訓
道通左氏春秋貫歷代史指畫羅列接在視聽嗜為文
章辭富理精以門廕出身調補宣州溧水尉綱簿貢賦

入于天府特授同州馮翊尉改京兆府雲陽主簿轉長
安主簿遷萬年丞端靖守貞處劇不撓秩滿居養素食
貧常好笠乾之道自振塵昏之外

振音展極也
外一作表

泊如也

既而嬰被沈疾不克永壽姻戚動懷朋友道傷僉曰天
之報施善人何如哉君前娶河南獨孤氏左司郎中緬
之女無子早世繼室以裴夫人諫議大夫虬之女陰教
內則著於閨闈有女三人焉嗚呼銘誌之來古矣是不
可闕遂刊勒玄石措于陰堂銘曰

振振吾宗德之宅耶惟君之德至其蹟耶德而不壽命
既厄耶松栢蒼耶不朽石耶

處士段弘古墓誌

御史中丞崔公能也時為永州刺史公元和九
年尚佐永州故薦弘古於崔迨其死崔猶為經
紀其喪可謂賢矣公正集有祭弘古文當其喪
過永州時作誌亦作於是時也隴西李景儉東
平呂溫化光中山劉禹錫夢得暨公及崔永州
皆弘古所與游者可以知其人矣呂化光集亦
有與段秀才
詩即弘古也

段處士弘古讀縱橫書剛峭少合尤濩落不事產入或

交之度非義輒去以故年五十不就祿嘗以法家言抵

御史大夫何士幹延以上座將用之會士幹死聞襄陽

節度使于頔愛人大言遂干以兵畫一見喜甚居月餘

視頔終不可與立功又遁去隴西李景儉東平呂溫高

氣節尚道藝聞其名求見大懼留門下或一歲或半歲

夜興言不知日出溫卒景儉逐前右拾遺張宿

一作道

與

然諾南見中山劉禹錫河東柳宗元二人者言於御史

中丞崔公公時降治永州知其信賢徵其去

徵與邀通遮也

又

南抵好義容州扶風竇羣途過桂桂守舊知君拒不為
禮君憤怒發病不肯治曰平生見大人未嘗相下今窮
於此年加老接接無所容入也益困於俗笑吾安用生
為埋道邊耳居六月死逆旅中崔公為出涕命特贈賻
致其喪來永州哭為祭之與喪具道里費歸葬澧州安
鄉縣黃山南麓上君之死元和九年後八月十六日後
某月日葬祖某官父某官妻彭城劉氏子知微知章皆
未冠銘曰

廉不貪直不倚困者吾之通者不以不懲其蹟卒以亢
死觀游非類有賤非鄙何以葬之黃山南趾

潞州兵曹柳君墓誌

誌云貞元二十一年

七月葬誌是時作

柳氏子某為平陸丞王父母之喪寓于外貞元二十一
年始葬于號之閭鄉窆墨遇食乃貽書其族尚書禮部
員外郎宗元使為其誌且曰吾之先自魏已來為宰相
者累世我高祖諱萬齒為伊闕令襲其先河間郡公曾

祖諱某浙州刺史咸有懿德洎于兵曹府君諱某勤身
惠志好義能讓而同故交者固直而敬故親者睦凡舉
明經者四皆獲美仕初為陸渾主簿次吳縣尉次上黨
丞次潞州兵曹叅軍其勾稽摘發毗贊關決無不勝職
加朝散大夫某年月日終于官次殯于州若干里會世
多難家又貧窶故不及夫事嗚呼我曾祖王父葬于潁
陽我伯祖叔祖洎伯父皆葬閬鄉皇天原望壽里潁陽
北臨間其地陰狹岸又數壞大懼不克久安神居是以

從他兆于茲卜用七月六日甲子將以具于玄堂之下
故有望乎爾也於是刪其書為文置于郵中俾移於
石上

永州司功叅軍譚隨亡母毛氏誌文

年月誌皆不載據題
云永州公在永時作

毛氏夫人父曰儀禹豐州別駕祖弘義濟州戶曹夫人
歸譚氏曰損為鄧州司倉叅軍損父昌為常州錄事叅
軍祖曰元愛為左羽林大將軍弘農男惟譚洎毛氏於

周咸為諸侯譚入于莒毛及魏為后族千歲復合夫人
生丈夫子曰隨隨謹愿好禮始克於裴柳為姻隨娶裴
氏今中書舍人次元之族弟也女子嫁柳氏曰從肇曰
余族兄也余早承族兄之教聞夫人之德且曰隨之所
以能立洎吾嫂之所以令皆夫人之訓則宜有以文其
聲詩刻而措諸墓夫人諱某壽若干某年月日終某月
日祔于此志曰

周之列國譚子毛伯合是二姓從其匹敵夫人有訓乃

策厥族惟時善良不享豐福懿厥子姓追號憲德內言
不出孰表貞節願垂休銘永誌幽谷

世所傳昌黎文公文雖經名儒手余昔嘗校以家集
其舛誤尚多有之用為之訓詁柳州文胥山沈公
謂其參考牙證是正漫乙若無遺者余紬繹既久稽
之史籍蓋亦有所未盡南嶽律和尚碑以廣德先乾
元御史周君碣以開元為天寶則時日差矣竇羣除
左拾遺而表賀為右拾遺連山復乳穴而記題為零

陵郡則名稱差矣代令公舉裴冕狀時柳州蓋未生
賀冊尊號表時已刺柳而云禮部作其他舛誤類是
不一用各疏其說於篇視文公集益詳諸本所餘復
編為一卷附於外集之末如胥山之識云淳熙丁酉
秋八月中泚臨邛韓醇記

柳河東外集補遺

柳河東集後序

唐之文章初未去周隋五代之氣中間稱得李杜其才始用為勝而號專雄訶詩道未極其渾備至韓柳氏起然後能大吐古人之文其言與仁義相華實而不雜如韓元和聖德平淮西柳雅章之類皆辭嚴義偉製述如經能峯然聳唐德於盛漢之表蔑愧讓者非二先生之文則誰與予少嗜觀二家之文常病柳不全見於世出人間者殘落纔百餘篇則雖目其全至所缺墜亡字

失句獨於集家為甚志欲補得其正而傳之多從好事
訪善本前後累數十得所長輒加注竄遇行四方遠道
或他書不暇持獨齎韓以自隨幸會人所寶有就假取
正凡用力於斯已蹈二紀外文始幾定久惟柳之道疑
其未克光明於時何故伏其文而不大耀也求索之莫
獲則既已矣於懷不圖晚節遂見其書聯為八大編
夔州前序其首以卷別者凡四十有五真配韓之鉅文
歟書字甚樸不類今蹟蓋往昔之藏書也從考覽之或

卒卷莫迎其誤脫有一二廢字由其陳故刪減讀無甚
害更資研證就真耳因按其舊錄為別本與隴西李之
才參讀累月詳而後止嗚呼天厚予嗜多矣始而饜我
以韓既而飫我以柳謂天不吾享豈不誣也哉世之學
者如不志於古則已苟志於古求踐立言之域捨二先
生而不由雖曰能之非予所敢知也天聖九年秋九月
河南穆脩伯長後序

柳河東外集後序

謹案卷上第一頁前六行劉義慶世說刊本義慶
訛慶義據隋唐經籍藝文志改又往往見寶刊
本訛作往見至寶又見鍾嶸文品刊本嶸訛崢
並據郭雲鵬本改

第二頁後八行郊之祭也刊本祭訛至據禮記郊
特牲改

第六頁前一行極深之幾是研刊本幾訛機據易
繫辭改

第六頁後一行夫無忠而忠見無孝而孝聞刊本
二無字俱誤吾據郭雲鵬本改

第六頁後七行臣投是龍于尺池之內刊本池訛
地據校宋本改


第十頁後二行學者無能如刊本如訛知據劉禹
錫集改

卷下第五頁前四行宗室支屬刊本支訛友據別
本改

第五頁後三行邊兵以整刊本以訛之據校宋本
改

第十頁前五行以違陛下之詔刊本脫違字據校
宋本增

第十九頁後四行其二曰月重輪刊本二曰訛曰
日據古今注改



總校官候補中書臣 吳紹潔

校對官編修臣 裴謙

謄錄監生臣 劉銓瑛

財團

佛陀教育基金會

釋淨空

敬贈